

आकाशवाणी

खास-खास खबरां:-

- प्रधानमंत्री नरेन्द्र मोदी होर अज्ज गुजरात दे गांधी नगर च जर्मनी दे चांसलर फ्रेडरिक मर्ज़ हुंदे नै डेलीगेशन स्तरै दी गल्लबात करगंन।
- राश्ट्री युवा दिवस दे मौके पर अज्ज प्रधानमंत्री नरेन्द्र मोदी “विकसित भारत युवा नेता संवाद-2026” आले कार्यक्रम च शामिल होगंन ते युवाएं ते प्रवासी भारतीयें कन्नै गल्लबात करगंन।
- इसरो अज्ज श्री हरिकोटा थमां डी.आर.डी.ओ दे धरतै दी निगरानी आले उपग्रैह इ.ओ.एस- एन.1 दा प्रक्षेपण करोग।
- केन्द्री मंत्री प्रहलाद जोशी होरें अक्षय ऊर्जा दी समर्थ च बाददे लेई विकासशील देशें दी सहायता गितै अंतराश्ट्री सहयोग दा आहवान कीता ऐ।
- ईरान च देशव्यापी प्रदर्शनें पर होई दी कारवाई च मरोने आलें दी गिनतरी बधियै 538 होई गेई ऐ।
- ते मर्दे दे इक ध्याड़े आले अंतराश्ट्री क्रिकेट च कल गुजरात दे वडोदरा च खेड्डे गेदे 3 मैचें दी श्रृंखला दे पैहले मकाबले च भारत नै न्यूजीलैंड गी 4 विकेटें कन्नै हराई दिता ऐ।

<><><><><><>

PM -German Chancellor

प्रधानमंत्री नरेन्द्र मोदी होर अज्ज अहमदाबाद च जर्मनी दे चांसलर फ्रेडरिक मर्ज़ हुंदे कन्नै मलाटी करगंन। प्रधानमंत्री मोदी ते चांसलर मर्ज़ होर साबरमती आश्रम दा दौरा करगंन ते अहमदाबाद च अंतराश्ट्रीय “पतंग उत्सव” च बी हिस्सा लैंगन।

एहदे मगरा महात्मा मंदर- गांधीनगर च बड्डलै 11 बज्जियै 15एं मिन्टे थमां दपक्खी बैठक लग्गोग- जित्थें प्रधानमंत्री मोदी ते जर्मनी दे चांसलर होर भारत-जर्मनी सामरिक सांझा-भ्याली दी प्रगति दा जायजा लैगंन- जिनें हाल च गै अपनी 25मीं बरे गंड मनाई ऐ।

<><><><><><>

PM- Youth Day

अज्ज “राष्ट्रीय युवा” दिवस ऐ अज्ज गै स्वामी विवेकानंद हुंदी जयंति बी ऐ। इस मौके पर प्रधानमंत्री नरेन्द्र मोदी होर अज्ज शामी नमीं दिल्ली च “विकसित भारत यंग लीडर्स डायलॉग-2026” दे समापन सत्र च शामिल होगंन। मोदी अंतराष्ट्रीय संगठनें दे युवा प्रतिनिधियें सनें देश-विदेश दे तकरीबन त्रै जहार युवाएं कन्ने गल्लबात करगंन। चुने गेदे प्रतिभागी प्रधानमंत्री दे अगगे दस थीमेटिक ट्रैकें च अखीरली प्रस्तुतियां देगंन- राष्ट्रीय महत्व दे प्रमुख क्षेत्रें लेई युवाएं दे दृष्टिकोण ते क्रियान्वयन जोग विचार सांझा करगंन। कार्यक्रम दे दौरान प्रधानमंत्री होर “विकसित भारत युवा नेता संवाद 2026” आस्तै निबंध संग्रह जारी करगंन- जेहदे च भारत दी विकास आहली प्राथमिकताएं ते दीर्घकालिक राष्ट्र निर्माण लक्षें पर युवा प्रतिभागियें आसेया लिखे गेदे चुने गेदे निबंध शामिल न।

<><><><><><>

Pez- Vivekanand

राष्ट्रपति द्रौपदी मुरमू होरें अज्ज “स्वामी विवेकानंद हुंदी जयंति” पर उनेंगी श्रद्धांजलि अर्पित कीती ऐ। स्वामी विवेकानंद हुंदी जयंति गी राष्ट्रीय युवा दिवस दे रुपै च मनाया जंदा ऐ। सोशल मीडिय दी इक पोस्ट च राष्ट्रपति होरें आखेया ऐ जे स्वामी विवेकानंद इक शाश्वत- दूरदर्शी ते आध्यात्मिक व्यक्ति हे। उनें एह उपदेश दिता जे अंदरुनी शक्ति ते मनुक्खता दी सेवा इक सार्थक जीवन दी नीह न।

<><><><><><>

ISRO-PSLV-C-62

भारती अंतरिक्ष अनुसंधान संगठन इसरो अज्ज बड्डलै 10 बज्जियै 17एं मिन्टे पर श्री हरिकोटा दे सतीश धवन अंतरीक्ष केन्द्र दे पैहले प्रक्षेपण केन्द्र थमां PSLV-C-62—EOS-N-1 मिशन दा प्रक्षेपण करोग। एह मिशन भारत दे सब्भनें शा भरोसेमंद ते कामयाब प्रक्षेपण - यान PSLV दी 64मीं डुआरी होग। इस मिशन दा संचालन New Space India Ltd. करा रदा ऐ। एह राकेट अपने कन्ने भारती ते होरनें देशें दे 15 होरनें उपग्रहें गी बी अंतरिक्ष च लेइयै जाहग। प्रक्षेपण च PSLV-DL- संस्करण दा इस्तेमाल कीता जा रदा ऐ- जेहड़ा 2 ठोस स्ट्रैप-ऑन मोटरें कन्ने लैस ऐ- जेहदे नै एह यान केई उपग्रहें गी स्टीक कक्षाएं च लेई जाने च सक्षम ऐ। इस मिशन दा इक बशेश आकर्षण स्पेन दे इक स्टार्ट-अप आसेया विकसित केस्ट्रैल इनिशियल टेक्नॉलोजी दी प्रदर्शन ऐ।

<><><><><><>

Vaishnav –Washington Visit

इलैक्ट्रॉनिक्स ते सूचना प्रोद्योगिकी सरबंधी मैहकमे दे केन्द्रीय मंत्री अश्विनी वैष्णव होर अज्ज अमरीका दे वांशिगटन च डी.सी. मंत्रीस्तरीय बैठक च हिस्सा लैगंन। जी-7 महत्वपूर्ण खनिज मंत्रीस्तरीय बैठक इक महत्वपूर्ण समा ऐ- जेहड़ी सामरिक संसाधनें लेई वैश्विक आपूर्ति श्रृंखला गी सुरक्षित करने पर केन्द्रीत ऐ। एहदे शा पैहले इक सोशल मीडिया पोस्ट च वैष्णव होरें आखेया हा जे विकसित भारत दे सुखने गी साकार करने आस्तै महत्वपूर्ण खनिजें दी सुरक्षित आपूर्ति श्रृंखला बड़ी मती जरुरी ऐ। वैष्णव होरें अमरीका दे खजाना मंत्री स्काट बेसैंट हुंटी हाल च कीती गेदी टिप्पणी दे मगरा एह गल्ल आखी ऐ जे आस्ट्रेलिया ते भारत सने केई होर मुख्य महत्वपूर्ण खनिजें पर चर्चा करने आस्तै वाशिगटन च जी-7 मुखें दे वित्त मंत्रियें दी बैठक च हिस्सा लैगंन।

<><><><><><>

Prahlad Joshi -IRENA

भारत नै बरे 2030 तगर 500 गीगावॉट गैर-जवाश्म ईंधन आधारत बिजली समर्थ ते बरे 2070 तगर सिफर कार्बन उत्सर्जन दा लक्ष्य हासल करने दी वचनबद्धता गी फही पक्का कीता ऐ। अबू-धाबी च अंतराष्ट्रीय नवीकरण ऊर्जा एजेंसी दी 16मीं बैठक च नमीं ते अक्षय ऊर्जा विभाग दे केन्द्री मंत्री प्रहलाद जोशी होरें आखेया जे ऊर्जा इस्तेमाल च बदलाव लेई भारत दा नज़िया वसुधैव कुटुम्बकम दे सिद्धांत थमां प्रेरित “इक धरती- इक परोआर- इक भविकख” ऐ। उनें आखेया जे एह नज़रिया- बरोबरी- समावेशिता ते नीतिगत स्थिरता दे लम्मी अवधि आले दृष्टिकोण पर आधारित ऐ। श्री जोशी होरें आखेया जे भारत नै पेरिस समझौते दे तैहत राष्ट्री स्तर पर त अपने योगदान लक्ष्य थमां 5 बरे पैहले गै 2025 तगर गैर- जीवाश्म ईंधन दे जरिये कन्ने स्थापत समर्थ दा 50 फीसद लक्ष्य हासल करी लैता ऐ। जोशी होरें अक्षय ऊर्जा दी समर्थ च बाददे लेई विकासशील देशे दी सहायता गिते अंतराष्ट्री सैहयोग दा आहवान कीता ऐ।

<><><><><><>

Iran –Death Toll

ईरान च जारी प्रदर्शनें पर होई दी कारवाई च मरोने आले दी गिनतरी बधिये 538 होई गई ऐ। अमरीका च स्थित मनुखी अधिकार कार्यकर्ताएं कन्ने सरबंधत समाचार एजेंसी नै दस्सेया ऐ जे मरोने आले च 490 प्रदर्शनकारी ते 48 सुरक्षाकर्मी न। एजेंसी नै आखेया जे 10 जहार 600 शा मते लोके गी हिरासत च लैता गया ऐ। ईरान च इंटरनेट ते फोन लाईनां ठप्प होने करी बदेशे थमां प्रदर्शन दी स्थिति दा आंकन करना होर बी औकखा होई गया ऐ। तौआई ईरान दी संसद दे अध्यक्ष मोहम्मद बगेर कलीबाफ होरें चेतावनी दिती ऐ जे जेकर अमरीका- राष्ट्रपति डोनाल्ड- ट्रम्प हुंदी धमकी दे मताबक देशे च चला करदे प्रदर्शनें दे चलदे इस्लामी गणराज्य पर हमला करदा ऐ तां अमरीकी सेना ते इज़राईल ओदे निशाने पर होगंन।

तोंआई संयुक्त राष्ट्र दे महासचिव अंतोनियो गुत्तरश होरें ईरानी अधिकारियें गी सबर रक्खने ते देशें च संचार बवस्था दी आज़ादी यकीनी बनाने दी गुज़ारश कीती ऐ।

<><><><><><>

Trump -Threatens Quba

अमरीका दे राष्ट्रपति डोनाल्ड ट्रम्प होरें हवाना गी कड़ी चेतावनी दिंदे होई आखेया ऐ जे क्यूबा गी हून वेनेजुएला कोला तेल जां पैहा नई थहोग। ट्रम्प होरें ओहदे नेताएं गी तौले गै वाशिंगटन कन्नै समझौता करने लेई आखेया। वेनेजुएला लम्मे चिरे दा क्यूबा दा मुख तेल आपूर्तिकता रेया ऐ- पर अमरीका नै सैन्य अभियान दे मगरा प्रतिबंध गी सख्त करी दित ऐ ते उत्थुंआ दी तेल दी खेप गी जब्त करी लैता ऐ। अमरीकी खुफिया एजेंसी नै आखेया ऐ जे क्यूबा दी अर्थबवस्था भारी दबाव च ऐ। राई-बाई ते सैलसफा ब्लैकमाउट-प्रतिबंध ते होर समस्याएं कन्नै प्रभावित ऐ।

<><><><><><>

Trump Greenland

अमरीकी राष्ट्रपति डोनाल्ड ट्रम्प होरें आखेया ऐ जे अमरीका- ग्रीनलैंड गी अपने कन्नै मलाई लैग। उनें चेतावनी दिती जे एहदे च नाकाम रौहने पर रुस जां चीन गी इस इलाके पर कब्जा करने दा मौका मिली जाहग। ट्रम्प होरें आखेया जे ओह गल्लबात दे राहें समझौते गी तरजीह दिंदे न। ग्रीनलैंड पर फौजी कारवाई दे बारे च ट्रम्प होरें आखेया जे अमरीका दा ध्यान- ग्रीनलैंड गी अपने कन्नै मलाने पर केन्द्रित ऐ। उनें ओकड़ी चैंताएं गी सिरे थमां खारज करी दिता जे ऐसी कुसै गैह कन्नै नाटो दा महत्व घट्ट होई सकदा ऐ। ग्रीनलैंड फिलहाल डेनमार्क दा इक खुदमुख्तयार इलाका ऐ जेहड़ा आर्कटिक च स्थित होने करी रणनीतिक तौर पर बड़ा महत्वपूर्ण ऐ। अमरीकी सेना पैहले गै ग्रीनलैंड च मजूद ऐ।

<><><><><><>

Cricket

भारत नै 3 इक रोजा मैचें दी श्रृंखला दे कल रातीं वड़ोदरा च खेड्डे गेदे पैहले मैच च न्यूजीलैंड गी 4 विकटें कन्नै रहाई दिता। 301 रन्ज दे लक्ष दे परते च भारत नै 49 ओवरें च 6एं विकटें दे नुकसान पर 306 रन्ज बनाइयै मैच जिती लैता। रोहित शर्मा दे तौले आउट होई जाने दे बाद कप्तान शुभमन गिल ते विराट कोहली नै पारी साम्भदे होई 118 रन्ज दी सांझेदारी कीती। गिल नै 71 गेंदे च 56 ते कोहली नै 91 गेंदे च 93 रन्ज दा योगदान दिता। एहदे शा पैहले न्यूजीलैंड नै पैहले बल्लेबाजी करदे होई 50 ओवरें च 8 विकटें दे नुकसान पर 300 रन्ज बनाए। इस जित दे कन्नै गै इस श्रृंखला च मेजबान टीम नै 1-0 दी बढत बनाई लैती ऐ। दुआ मैच बुधवारें राजकोट च ते त्रीया ते खीरी मैच 18 जनवरी गी इंदौर च खेडेया जाहग।

<><><><><><>